



TEKS

KHUTBAH

NEGERI PAHANG

APRIL 2026



AKIDAH MURNI SUMBER KEKUATAN

17 APRIL 2026M | 28 SYAWAL 1447H

الْحَمْدُ لِلَّهِ نَحْمَدُهُ وَنُسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شَرِّهِ وَأَنْفُسِنَا وَمِنْ سَيِّئَاتِ

أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.

أَمَّا بَعْدُ،

فِيَا عِبَادَ اللَّهِ، اتَّقُوا اللَّهَ وَأَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita meningkatkan keimanan dan ketakwaan kepada Allah ﷻ dengan melaksanakan segala suruhan-Nya dan menjauhi segala larangan-Nya. Mudah-mudahan kita peroleh keampunan serta kesejahteraan hidup di dunia dan di akhirat.



Sidang Jumaat yang dirahmati Allah Taala,

Akidah ialah keimanan dan keyakinan yang teguh di dalam hati terhadap Allah ﷻ, malaikat-Nya, kitab-Nya, Rasul-Nya, hari akhirat serta qada' dan qadar. Akidah yang benar akan melahirkan jiwa yang tenang, hati yang kuat dan pendirian yang tidak mudah goyah dalam menghadapi cabaran kehidupan. Firman Allah ﷻ dalam surah Ibrahim ayat 27:

أَعُوذُ بِاللَّهِ مِنَ الشَّيْطَانِ الرَّجِيمِ

يُثَبِّتُ اللَّهُ الَّذِينَ ءَامَنُوا بِالْقَوْلِ الثَّابِتِ فِي الْحَيَاةِ الدُّنْيَا وَفِي الْآخِرَةِ وَيُضِلُّ اللَّهُ

الظَّالِمِينَ وَيَفْعَلُ اللَّهُ مَا يَشَاءُ ﴿٢٧﴾

Yang bermaksud: “Allah meneguhkan orang yang beriman dengan ucapan yang teguh dalam kehidupan di dunia dan di akhirat; dan Allah menyesatkan orang yang zalim, dan Allah memperbuat apa yang Dia kehendaki”.

Ayat ini menjelaskan bahawa iman yang kukuh menjadi sumber keteguhan ketika berhadapan ujian hidup seperti kemiskinan, penyakit, tekanan emosi serta cabaran pemikiran dan akhlak.



Sidang Jumaat yang dimulihkan

Akidah yang murni hendaklah dibina di atas asas yang kukuh sebagaimana hadis diriwayatkan oleh Imam Muslim:

قَالَ: فَأَخْبِرْنِي عَنِ الْإِيمَانِ، قَالَ: أَنْ تُؤْمِنَ بِاللَّهِ، وَمَلَائِكَتِهِ، وَكُتُبِهِ وَرُسُلِهِ، وَالْيَوْمِ
الْآخِرِ، وَتُؤْمِنَ بِالْقَدَرِ خَيْرِهِ وَشَرِّهِ قَالَ: صَدَقْتَ،

Yang bermaksud: “Dia (malaikat Jibril yang berupa lelaki) berkata lagi: “Jelaskan kepadaku tentang iman?” Nabi ﷺ menjawab: “(Iman itu adalah) Engkau beriman kepada Allah, malaikat-malaikat-Nya, kitab-kitab-Nya, rasul-rasul-Nya dan hari akhirat serta engkau beriman kepada takdir baik dan buruk.” Ia berkata: ‘Engkau benar.’”

Hadis ini menjelaskan bahawa, enam rukun iman yang mesti ditanam ke atas setiap individu Muslim iaitu keimanan kepada Allah ﷻ, keimanan kepada para malaikat-Nya, kitab-kitab-Nya, Rasul-Rasul-Nya dan hari kiamat serta beriman dengan qada dan qadar.

Yang dimaksudkan beriman kepada Allah ﷻ ialah sebenar-benar yakin bahawa Allah ﷻ maha kaya dan maha berkuasa, dan manusia bergantung harap kepada-Nya. Demikian juga, beriman kepada para malaikat ialah keyakinan yang jitu (jazam) bahawa para malaikat diutuskan oleh Allah Taala untuk melaksanakan segala perintah, menyembah dan patuh serta taat kepada-Nya. Kita juga hendaklah



meyakini sungguh-sungguh terhadap kitab yang diwahyukan kepada para Rasul, dan pengutusan para Nabi dan Rasul kepada umat manusia untuk memandu manusia ke jalan yang benar. Kita juga hendaklah meyakini sungguh-sungguh adanya hari kiamat yang menjadi tempat pembalasan baik dan buruk. Demikian juga, keyakinan terhadap ketentuan baik dan buruk (qada dan qadar) merupakan dasar penting yang perlu diyakini secara jazam. Oleh itu, segala yang berlaku dalam kehidupan manusia telah diketahui, ditentukan dan berlaku dengan kehendak Allah Taala.

Sidang Jumaat Yang Dirahmati Allah Taala,

Akidah murni yang didasari oleh keimanan kepada qada dan qadar, akan menjadikan seorang Muslim tidak mudah putus asa kerana yakin setiap ujian datang daripada Allah ﷻ. Mereka tidak bergantung kepada makhluk kerana hanya Allah ﷻ tempat pergantungan, serta tidak gentar kepada cabaran kehidupan dan tidak akan berputus asa ketika ditimpa musibah. Sabda Rasulullah ﷺ dalam hadis yang diriwayatkan oleh Imam Muslim:

عَجَبًا لِأَمْرِ الْمُؤْمِنِ، إِنَّ أَمْرَهُ كُلَّهُ خَيْرٌ

Yang bermaksud: “*Sungguh menakjubkan urusan orang yang beriman, sesungguhnya seluruh urusannya adalah kebaikan*”.

Hadis ini menunjukkan bahawa setiap urusan bagi orang beriman adalah kebaikan, sama ada ketika senang mahupun susah. Namun, akidah tidak akan kekal



murni jika tidak dipelihara. Ia boleh rosak akibat kepercayaan khurafat, kebergantungan kepada selain Allah ﷻ, fahaman sesat, menolak hukum-hakam Allah Taala serta mengamalkan gaya hidup songsang yang menjauhkan diri daripada agama. Bahkan kejadian bunuh diri yang berlaku menunjukkan krisis keimanan terhadap qada dan qadar yakni ketentuan baik dan buruk daripada Allah Taala.

Sidang Jumaat yang dirahmati Allah Taala,

Sesungguhnya akidah yang benar mesti disirami dengan mengingati Allah Taala bagi melahirkan hati yang tenang. Firman Allah ﷻ dalam surah al-Ra'd ayat 28:

الَّذِينَ ءَامَنُوا وَتَطْمَئِنُّ قُلُوبُهُمْ بِذِكْرِ اللَّهِ أَلَا بِذِكْرِ اللَّهِ تَطْمَئِنُّ الْقُلُوبُ ﴿٢٨﴾

Yang bermaksud: *“Orang yang beriman, hati mereka menjadi tenang dengan mengingati Allah. Ketahuilah, hanya dengan mengingati Allah-lah hati menjadi tenang”.*

Sidang Jumaat yang dimuliakan Allah Taala,

Pengajaran khutbah hari ini ialah:

Pertama, akidah ialah keyakinan yang teguh (jazam) terhadap Allah ﷻ, malaikat-Nya, kitab-Nya, Rasul-Nya, hari akhirat serta qada' dan qadar.



Kedua, akidah yang benar melahirkan individu yang boleh berdepan cabaran kehidupan dan ujian, mempunyai jiwa yang tenang dan pendirian yang kuat.

Ketiga, akidah perlu dibuktikan dengan amal soleh dan akhlak yang mulia serta menjauhi perkara-perkara yang boleh membatalkan iman.

أَعُوذُ بِاللَّهِ مِنَ الشَّيْطَانِ الرَّجِيمِ

الَّذِينَ ءَامَنُوا وَلَمْ يَلْبِسُوا إِيمَانَهُمْ بِظُلْمٍ أُولَٰئِكَ لَهُمُ الْأَمْنُ وَهُمْ مُّهْتَدُونَ ﴿٨٢﴾

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ

وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ

قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ،

وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.